

## Comitât – Odbor – Komitaat – Comitato 482

c/o "Informazione Friulana" soc. coop.  
V. Volturmo, 29 I - 33100 Udin  
Tel.: 0432 530614 Fax: 0432 530801 D.p.e.: com482@libero.it

\*\*\*

*Ae atenzion cortese dal President de Comission Europeane, José Manuel Barroso.*

Stimât President,

o vin il plasê di dâi, prin di dut, il nestri benvignût in Friûl, piçul blec de Europe là che di secui a vivin intune popolazions che a fevelin lenghis che a partegnin aes trê fameis linguisticis europeanis principâls: neolatine, slave e gjermaniche. E je une realtât, la nestre, che e je un spiel de Europe e dal so jessi unitât te diviersitât: une tiere che il so non al sune Friûl, Furlanija, Friaul, Friuli daûr de lenghe mari dai siei abitans. Une unitât te diviersitât che ancje il Comitât / Odbor / Komitaat / Comitato 482, tal so piçul, al stime di rapresentâ cul meti adun, sot di un non unic, passe trete realtâts associativis e mieçs di informazion impegnâts te difese dai dirits linguisticis dai furlans, dai slovens e dai todescs dal Friûl.

Il teme sielzût dai Stâts Gjenerâi des Regjons Europeanis e de Assemblee Gjenerâl de ARE, in program dai 7 ai 9 di Novembar in Friûl, al è "Identitâts, lis regjons tant che fonde de Europe". *"Une identitât europeane vere no cjape il puest e no strassomee lis identitâts regionâls e nazionâls – al scrîf tal invît prontât pe ocasion il President de Regjon Friûl - Vignesie Julie e de Assemblee des Regjons de Europe, Riccardo Illy – ma e fonde lis sôs lidrîs te nestre diviersitât, che e je uniche."* Par chel che nus rivuarde, o sin in cunvigne cun cheste riflession e i din at al president Illy di sostignî bielzà di timp la dibisugne di promovî lis diviersis identitâts locâls e di valorizâ lis diversitâts tant che imprest di cressite culturâl, sociâl e ancje economiche.

Cun di plui, tal invît uficiâl pe Assemblee, si cjate ancje une domande, ven a dî: *"Cemût puedino lis Regjons planificâ e guviernâ il lôr teritori e, tal stes timp, infuartî il sens di partignince e la solidarietât tra i citadins?"*

Par chel che nus rivuarde, magari cussì no, o podìn za dâ une rispuete: no dal sigûr come che e je daûr a fâ la Regjon Friûl - Vignesie Julie! Di fat, ta chestis zornadis, il Consei regionâl dal Friûl - Vignesie Julie al è impegnât a discuti un test di leç su la lenghe furlane: lenghe proprie di passe 600 mil citadins/is di cheste Regjon e di miârs di furlans ator pal mont. Cundut des domandis fatis indenand des istituzions furlanis plui impuartantis – Universitât, Arcidiocesi, Provincie e Comun di Udin, sindacâts, associazions, e v.i. dâts dongje che nol è tant in assemblee a Udin – di no fâ pas indaûr rispjet ae leç statâl di tutele des minorancis linguisticis dal 1999 e a chê regionâl su la lenghe furlane dal 1996 e, par dongje, di difindi lis propuestis dai esperts nomenâts di pueste par meti adun un stampon di leç su cheste materie, il Consei regionâl al à za fatis buinis cetantis modifichis e al è pront par fânt altris, cul risi reâl di limitâ e, in cierts câs, di impedî che lis misuris di tutele a sedin metudis in vore pardabon. Baste pensâ che, dai principis di riferiment dal test di leç, e je stade gjavade vie la Convenzion di suaze pe protezion des minorancis nazionâls!

Cuant che o pensin a di une Europe unide te diviersitât, dal sigûr no vin tal cjâf un model di cheste fate. No si pues vê une unitât vere fintremai che dutis lis diviersitâts no saran rispjetadis cui fats e no dome cu lis peraulis. Un tant al vâl pe Regjon Friûl - Vignesie Julie, pal Stât talian e pe Union Europeane. A son milions, in Europe, i citadins che si cjatin te stesse nestre situazion. Ce avignî varîno se i lôr dirits linguisticis a laran dilunc a jessi tibiâts?

President Barroso, tant che massim rapresentant istituzionâl european, I domandìn di fâ sintî la Sô

vôs par difindi la nestre lenghe e par riclamâ la Regjon Friûl – Vignesie Julie al rispjet dai dirits linguistics dai furlans. Fevelâ furlan al è fevelâ european.  
Grazie pe sô atenzion. Mandi.

Udin, 09/11/2007

Il quartevôs dal **Comitât / Odbor / Komitaat / Comitato 482**  
Carlo Puppo

*par cont di:*

Associazione “ <b>Ad Undecimum</b> ”;	<b>Circul</b> culturâl <b>Sauran “F. Schneider”</b> ;
Associazione “ <b>Beneške korenine</b> ”;	Cooperative di servizis linguistics “ <b>Serling</b> ”;
Associazione “ <b>Don Eugenio Blanchini</b> ”.	“ <b>Informazion Furlane</b> ” Societât Cooperative;
Associazione “ <b>FaF – Fantats Furlans</b> ”;	<b>Istitût Ladin-Furlan</b> “Pre Checo Placerean”;
Associazione “ <b>Glesie Furlane</b> ”;	<b>Istitût “Achille Tellini”</b> ;
Associazione “ <b>La Grame</b> ”;	<b>Istitût “Pio Paschini”</b> ;
Associazione “ <b>La Siele</b> ”;	<b>Istitût di Culture Timavese</b> ;
Associazione “ <b>Matajur</b> ”;	<b>Most</b> piccola società cooperativa a r.l.;
Associazione “ <b>S. Pietro</b> ”;	Redazion “ <b>La Comugne</b> ”;
Associazione culturâl “ <b>Colonos</b> ”;	Redazion “ <b>Ladins dal Friûl</b> ”;
Associazione culturâl “ <b>El Tomât</b> ”;	Redazion “ <b>Lenghe.net</b> ”;
Associazione culturâl “ <b>Guido da Variano</b> ”;	Redazion “ <b>Radio Onde Furlane</b> ”;
Associazione culturâl “ <b>Pionîrs</b> ”;	Redazion “ <b>Slovit – Bollettino di Informazione degli Sloveni in Italia</b> ”;
Associazione culturâl “ <b>Rozajanski Dum</b> ”;	Redazion <b>taicinvriaul.org</b> ;
Associazione culturâl slovene “ <b>Planika</b> ”;	<b>Stazione di Topolò – Postaja Topolove</b> ;
Associazione e redazion “ <b>La Patrie dal Friûl</b> ”;	<b>Union Scritôrs Furlans</b> .
Associazione e redazion “ <b>Novi Matajur</b> ”;	
<b>Circul</b> culturâl “ <b>G. Unfer</b> ” – Tamau;	

plui citadins che a partegnin aes diviersis comunitâts linguistichis dal Friûl – V.J.